

No.D.12015/1/2025-FEA
GOVERNMENT OF MIZORAM
FINANCE DEPARTMENT
(Economic Affairs)

MINECO, Aizawl, the 15th April, 2025

MUHCS chungchang thil chiang tawk lo sawi fiahna

Mizoram Universal Healthcare Scheme chu April ni 1, 2025 atanga hman a ni ta a, Sawrkar chuan he healthcare hi sawrkar hnathawk leh pensioner te mai bakah mipui mimir tena t̃angkai taka an hman a, mi tinin a zar an zo ngei hi a beisei leh a duhthusam chu a ni.

He scheme hnuaia Sawrkar hnathawk leh pensioner te leh he scheme khawihtu hrang hrangte hriat tur pawimawh zualte hetiang hian rawn tarlan a ni e –

1. Pensioner/Family Pensioner te tan:

- 1.1 He scheme hnuaia inziakluh hi pensioner/family pensioner-te tan chuan an duhthlanna inziak lut a, inziak lut lo thei an ni. Pensioner anga inziak lu duh lote pawh mipui nawlpui angina ₹2500/5000/10000 pea inziakluh theih a ni.
- 1.2 Mi pakhat-in pension pakhat aia tam a la a nih chuan, a pension lak a engemaw ber pakhat hmangin he scheme-ah hian a inziak lut thei a. Fixed Medical Allowance erawh chu pension pakhat chiah MUHCS a zawmn PPO hmang chauhin a la chhonzawm thei ang. PPO danga mi te chu surrender tur a ni ang.
- 1.3 Chhungkaw pakhat pensioner/family pensioner pakhat aia tam an awm a nih chuan, he scheme hnuaia inziakluh vek kher a ngai lova, a tu emaw ber a inziak lut a nih chuan pensioner dangte pawh chu family ration card-a an chuan chuan, an huam tel thei a. Hei hian nupaa pensioner-te pawh a huam ang.

Amaherawhchu, chungkuua pensioner/family pensioner pakhat aia tam he scheme-ah hian an inziak lut a nih chuan, an 'total financial benefit' ceiling hi an inziakluh ang zelin a inbelhchhah thung ang.

- 1.4 Chhungkaw pakhat pensioner pakhat aia tam an awmin pakhatin MUHCS a zawm a, a sum hman theih chin a hman zawh hnua mi dang inziakluh leh chauh kha phal a ni lo a, Inziakluh theih hun chhunga inziakluh vek tur a ni a, a inchiawka inziakluh a theih loh.
- 1.5 Sawrkar hnathawk lai (Regular Employee) nupui emaw pasal pensioner-in 'fixed medical allowance' a lak loh chuan, CS(MA) Rules 1944 anga dependant family

member a la nih avangin, anni tan he scheme hnuaia inziah luh ve kher a ngai lo ang.

Amaherawhchu, an chhungkaw member zingah CS(MA) Rules 1944 in a huam loh, 'ineligible member' an awm chuan, pensioner hian, a duh a nih chuan, pensioner pangaia inziak lutin emaw mipui nawlpui inziah luh angin ₹2,500/5,000/10,000 chawiin emaw a inziak lut thei ang a, a chhungkaw member te a huam tir thei ang.

- 1.6 Tin, pensioner/family pensioner chhungkua-ah Sawrkar hnathawk lai (Regular emaw PE emaw) an awm a nih chuan, heng mite tan hian he scheme-a inziahlul ngei ngei a ngaih (compulsory) avangin, ration card-ah an hming chuang mah sela, family member list-ah telh ve loh tur an ni.
- 1.7 Pensioner/Family Pensioner-te tan he scheme hnuaia inziahlul huntiam chu – April ni 1, 2025 hmalama pensioner/family pensioner ni sa tan June 2025 thleng hun hawn a ni a, April ni 1, 2025 hnulama pension-te tan erawh chuan huntiam chu an pension hun hun a ni thung ang a, an pension tihfel ruala inziahlul theih a ni ang.
- 1.8 April ni 1, 2025 hmalama Pensioner/Family Pensioner te huntiam hnulama he scheme hnuaia an inziak lut leh duh si a nih chuan, huntiam ral aṭanga tehin thla khat zelah late fee ₹100/- an chawi a ngaih bakah, April ni 1 aṭanga teha a inziah luh leh thlenga monthly subscription fee awm tur ang (arrear) a chawi a ngai tel baw ang. Hei hi inziah luh hunah a hlawmin pension bill-ah cut a ni ang.

Entirnan: April ni 1, 2025 hmalama Pensioner/Family Pensioner hian July thla-ah lo inziak lut ta se, hun tiam thla khata a pelh avangin late fee-ah ₹100/- a chawi a ngai ang a, monthly subscription fee arrear-ah erawh thung chuan April ni 1 aṭanga June thla thleng, ₹3,000 (Category A tan)/₹1,500 (Category B tan) a chawi a ngai thung ang.

April ni 1, 2025 hnulama pension-te tan erawh an pension tihfel ruala an inziaklut lo a nih chuan, a hnu lamah chuan late fee leh arrear hi an pension ni aṭanga chhiar a ni thung ang.

- 1.9 He scheme-a inziak lut tawh, inhnuk kir leh duh an awm a nih pawhin kum khat chhung chu subscription fee hi an chawi a ngai dawn tho a ni.
- 1.10 A hranpa taka an inhnuk kir kher lo a nih chuan, he scheme hi zawm chhunzawm zel turah ngaih a ni ang a, subscription hi kum tharah pawh cut chhunzawm zel a ni ang.

- 1.11 Sawrkar-in he scheme a tidanglam a nih chuan, a tihdanglam ang zela kalpui a ni ang.

2. Regular Government Employee te tan:

- 2.1 He scheme hi Sawrkar hnathawk regular-te tan chuan compulsory a ni a, April 2025 chhungin Controlling Officer hnenah form duan sa hmangin family declaration theh luh tur a ni. Chhungkaw pakhat sawrkar hnathawk pakhat aia tam pawh awm se an contribute vek a ngai a ni.
- 2.2 Sawrkar hnathawk regular-te tan chuan an dependent family member-te hi CS(MA) Rules, 1944 zula kalpui a ni.
- 2.3 Dependent family member-in a huam loh chhungkaw member dangte chu, he scheme hnuaiah hian kep theih an ni lo a, he scheme hamthatna dawng ve thei tur chuan a hranpaa mipui nawlpui anga an inziahluh ve a ngai dawn a ni.
- 2.4 MUHCS hi sawrkar hnathawkte **Contributory Healthcare Scheme** a nih angin, All India Service Officer te leh Central Service Officer, Mizoram-a deputation-a awm te a huam a, mahse heng officerte hian Mizoram sum senso awm lohna Healthcare Scheme dang an zawm duh zawk a nih chuan a huam lo thei ang.

3. Provisional Employee te tan:

- 3.1 He scheme hi Provisional Employee-te tan chuan compulsory a ni a, April 2025 chhungin Controlling Officer hnenah form duan sa hmangin family declaration theh luh tur a ni.
- 3.2 Provisional Employee-te tan hian chhungkaw member huam theih hi chhungkaw ration card mila kalpui tur a ni a. Nimahse, chhungkuua Pensioner/Family Pensioner an awm a nih chuan, ration card-ah an hming chuang mah sela, telh ve loh tur an ni.
- 3.3 Chhungkaw pakhat PE pakhat aia tam an awm a nih pawhin an vaiin contribution an pek vek a ngai a, contribution pe an pun ang zelin an sum hman theih pawh a pung ang.

4. Work charged employees te, Contract employees te, GIA hnuaia hlawh la te leh CSS hnuaia hnathawk te'n MUHCS an zawm theih dan tur ngaihtuah mek a ni.